

E edificio Multifuncional ta bay ta un joya pa Paradera

EDIFICIONAN Multifuncional MFA ta algo nobo na Aruba. Un iniciativa di Prome Minister Mike Eman, kende a pone esaki como parti di e vision di su Gobierno pa logra duna comunidad mas comodidad den servicio cu ta wordo brinda den barionan. E prome Edificio Multifuncional cu a cuminsa construcion ta esun na Noord y e siman aki tabatin e ceremonia di groundbreaking na Paradera, unda Prome Minister Eman tabata presente hunto cu e arkitekto envolvi Joel Croes y diferente funcionarionan di MFA. Den bishita realisa na diferente Oficinanan Auxiliar di Gobierno den barionan a constata cu e espacio no ta adecua, "e hendenan ta hopi riba otro y e lugar ya no ta apto. Asina a cuminsa cu e idea pa edificionan MFA." Prome Minister Eman a presenta e idea di edificionan MFA.

E edificio di MFA Paradera ta algo hopi grandi pa Paradera y bisindario, un edificio moderno cu ta trece hopi alivio pa e habitantenan, Mario Kelly, assistant manager di MFA Paradera a comenta. El a splica cu a scoge un arkitekto cu tin afinidad cu e bario, pero tambe a haci un encuesta den e bario pa haya sakico e habitantenan kier mira ubica den un edificio manera di MFA y "nos a logra haya algun bon idea pa e diseño di MFA Paradera". Loke cu a resalta den esun di Paradera ta cu lo haya un edificio hopi moderno, unda ta uza hopi glas. "E ta un joya pa Paradera", Kelly a comenta orguyosamente. E funcionario a sigui bisa cu asina cu e edificio wordo entrega, nan ta cla pa cuminsa cu



nan

operacion eyden. E lo inclui sigur e Oficina

Auxiliar di Gobierno cu lo amplia nan servicio, pero tambe diferente otro oficina cu lo brinda nan servicio na e comunidad di Paradera. Banda di servicionan, e MFAnan ta inclui tambe espacionan pa les y encuentronan cultural, musical, baile y diferente otro actividadnan.



MFA Paradera ta trece un cambio grandi pa e bario aki riba servicio cu ta brinda

SIMAN di 19 di januari a cuminsa di gran forma pa Gabinete Mike Eman II na momento cu a cuminsa cu e trabounan pa construcion di e di dos edificio di MFA na Paradera. Prome Minister Mike Eman presente a expresa su satisfaccion, ya cu e sitio na unda e Oficina Auxiliar Paradera ta situa awor no ta adecua mas pa e servicionan cu e ta brinda.

Aña pasa a cuminsa cu construcion di e prome di e cinco edificionan MFA cu ta den preparacion na Noord cu ta riba schedule pa wordo entrega maart proximo. E MFA-nan aki, e mandatario a

expresa e mainta aki, ta hopi necesario pasobra un cantidad grandi cu ciudadanonan di bario ta busca diferente tipo di servicio mas cerca di nan. "E vision cu nos a presenta algun aña pasa y cu nos a cuminsa traha riba dje ta birando realidad."

A wordo splica cu Gobierno a inverti den edificionan aki pa nan refleha e necesidadnan den cada un di e barionan. Pa logra esaki tabatin anochinan di consulta cu habitantenan di e barionan p'asina e arkitectonan tende di e necesidadnan cu tin. Pero tambe a haci un estudio cual ta e necesidadnan pa servicio na e oficinanan auxiliar di

Gobierno. Ya caba 5 tipo di documento por wordo busca na Censo na Oficina Auxiliar di Gobierno, hibando e servicio mas cerca di ciudadanonan den bario.

E ariba menciona, Prome Minister Eman a señalá, ta haci cu e fluho di personanan cu ta acudi na e Oficinanan Auxiliar di Gobierno ta aumenta "poniendo un presion basta grandi riba e facilidad unda ta ricibi of duna servicio na ciudadanonan. Pesey a cuminsa pensa con pa modernisa y amplia e facilidad den cual e HBKnan ta ubica y haci nan multifuncional di biaha." Den e MFA-nan a crea un ambiente hopi mas

agradabel pa e cliente por spera su turno pa wordo atendi of pa e ciudadano haci uzo di un di e facilidad cu tin, incluso pa hobennan.

Den e vision aki, Gabinete Mike Eman II a scoge cinco (5) arkitekto cu tin afinidad pa e barionan, pa inclui elementonan cu e bario ta haya importante pa keda refleha den e arkitektura. E ubicacion scogi pa e MFA Paradera ta net dilant e Hulpbestuurskantoor actual, unda cu tin hopi baranca y e arkitekto Joel Croes a percura pa esaki wordo inclui den e landscaping di e proyecto.

"Henter Paradera ta bay haya un edificio hopi mas eficiente

y agradabel, un area pa grandinan por topa otro y bebe un koffie," Eman a splica.

E edificio MFA lo tin un area pa BSK, pero tambe tin espacio pa grandinan topa, oficina pa fundacion, espacio publico pa diferente tipo di presentacion y hopi mas. "Pesey nos ta contento cu awe nos a yega asina leu, diseño, haci destaho publico y awor e trabou ta bay cuminsa," e mandatario a duna di conoce.

E proyecto aki ta un cambio hopi grandi pa pueblo di Paradera y bisindario hunto cu iniciativanan priva manera riba veld di Britannia, cu ta contribui na un mehoracion di calidad di bida.